

MOCIÓN QUE PRESENTA O GRUPO MUNICIPAL DO BNG NO CONCELLO DE NARÓN PARA O SEU DEBATE EN PLENO SOBRE A VAGA DE LUMES FORESTAIS QUE ASOLOU GALIZA NO MES DE AGOSTO E AS MEDIDAS NECESARIAS PARA EVITAR QUE SE REPITA ESTA CATASTROFE MEDIANTE UNHA POLÍTICA DE PREVENCIÓN E UNHA XESTIÓN INTEGRAL DO MEDIO.

Olaia Ledo Díaz, portavoz municipal do Grupo Municipal do Bloque Nacionalista Galego (BNG) no Concello de Narón, ao abeiro da lexislación vixente, presenta a seguinte MOCIÓN para o seu debate en pleno :

Exposición de motivos:

Galiza viviu no pasado mes de agosto unha das peores vagas de lumes forestais da súa historia recente. A desolación e a ferida aberta que esta catástrofe ambiental, social e económica deixou en gran parte do noso territorio son palpábeis e esixen unha reacción inmediata e contundente. Lonxe das cifras oficiais ofrecidas pola Xunta, que reduciu as hectáreas queimadas a 111.000, os datos do satélite europeo Copérnicus sitúan o total en máis de 162.000, o que demostra a magnitude real do desastre. Esta vaga de lumes NON É ALLEA A Narón porque, a pesar de ter “a sorte” de que non acontecesen lumes grandes no noso concello as consecuencias do cambio climático e a planificación da Xunta de Galiza non nos exime de que poida acontecer nas estacións secas. Temos que ter en conta que máis que unha praga bíblica, ou unha acción atribuíbel soamente a mentes perturbadas, é a consecuencia directa dunha xestión *absolutamente negligente* por parte do goberno galego, tanto na prevención como na xestión da emerxencia.

O modelo de loita contra o lume do Partido Popular demostrou, unha vez máis, o seu absoluto fracaso. A falta de planificación, de prevención e de recursos eficientes por parte da Xunta converteu a situación nunha auténtica catástrofe. A xestión foi errática, sen a coordinación necesaria, deixando a moitas brigadas e concellos traballando en circunstancias extremadamente adversas e, en moitos casos, en total desamparo. Malia o esforzo heroico de brigadistas, veciñanza e persoas voluntarias —a quen queremos agradecer e recoñecer publicamente o seu labor—, a política forestal do PP non está á altura das necesidades dun país co 70% da súa superficie arbórea.

Esta vaga de lumes deixa unha lección clara: non podemos seguir como estabamos. A rabia, a dor e a indignación ante unha catástrofe que podería terse evitado deben traducirse en acción política. A Xunta de Galiza non pode seguir respondendo con “silencio, resignación ou a rutina de promesas baleiras e propaganda”. O uso político partidista e carroñeiro que o PP quixo facer no medio dos peores incendios da nosa historia é inadmisíbel. Galiza merece un modelo de monte e de rural diferente, que xere riqueza, poña en valor a nosa contorna natural e que nos protexa de forma efectiva.

É por iso que o BNG defende un cambio estrutural e unha estratexia integral sobre o conxunto do territorio que teña como obxectivo evitar que un desastre deste tipo se volva a repetir. Fronte ás políticas fracasadas do pasado, Galiza precisa unha alternativa de futuro para o noso medio rural, un plan que procure a atención inmediata ás persoas afectadas, a recuperación ambiental real, un novo modelo de monte multifuncional, unha prevención estrutural e eficaz, e a revitalización socioeconómica do rural.

Por tanto presentamos os seguintes **ACORDOS**:

1. Instar á Xunta de Galiza a maior investimento do prometido e que non se contempla agora nos orzamentos. Crear un **Fondo de Recuperación Económica, Social e Ambiental** Xunta-Estado para facer fronte aos danos da vaga de lumes. Este fondo deberá incluír axudas directas de ata 200.000 € para a reconstrución de vivendas e unha achega de 6.000 € para autónomos, pequenas e medianas empresas e a economía social, coa mínima burocracia posible.
2. Urxir á Xunta de Galiza a pór en marcha un **Plan Verde de restauración ambiental** das áreas afectadas, que se centrará na restauración ecolóxica, a protección da biodiversidade e a recuperación dos solos. Así mesmo, esixirlle a aplicación dunha emenda á moratoria **inmediata a novas plantacións de eucalipto que permite que en superficie queimada de Piñeiro se plante eucalipto** para reconducir a política forestal cara a un modelo de monte ordenado e multifuncional tal e como reclama, por exemplo a empresa de Madeira máis importante de Galiza en canto a produción e PIB do noso país, FINSA MADERERA, S.A..
3. Instar á Xunta de Galiza a **duplicar os fondos de prevención** nos dous próximos anos para garantir que o 25% dos orzamentos do Servizo de Prevención e Extinción de Incendios Forestais sexan destinados unicamente a labores preventivas.
4. Exixir o **reforzo e a profesionalización dos servizos de prevención e extinción**, incluíndo a creación de 70 brigadas móbiles de vixilancia e a dotación de medios e equipos adecuados para o ataque a grandes incendios. Tamén, garantir a mellora das condicións laborais do persoal do servizo.

Narón a 12 de Decembro de 2025

Asdo. Olaia Ledo Díaz